

南無本師釋迦牟尼佛



法師功德品第十八

爾時佛告常精進菩薩摩訶薩。若善男子善女人。受持是法華經。若讀若誦。若解說。若書寫。是人當得六根清淨功德。以是功德莊嚴六根。皆令清淨。是善男子善女人。父母所生清淨肉眼。見於三千大千世界。內外所有山林河海。下至阿鼻地獄。上至有頂。亦見其中一切衆生。及業因緣果報生處。悉見悉知。

若於大衆中	以無所畏心	說是法華經	汝聽其功德
是人得清淨	功德殊勝眼	以是莊嚴故	其目甚光明
父母所生眼	悉見三千界	內外彌樓山	須彌及鐵圍
并諸餘山林	大海江河水	下至阿鼻獄	上至有頂天
其中諸衆生	一切皆悉見	雖未得天眼	肉眼力如是

復次常精進。若善男子善女人。受持此經。若讀若誦。若解說。若書寫。得清淨耳功德。聞三千大千世界。下至阿鼻地獄。上至有頂。其中內外種種語言音聲。畜生聲。鬼神聲。苦樂聲。比丘聲。比丘尼聲。聲聞聲。辟支佛聲。菩薩聲。佛聲。以要言之。三千大千世界中。一切內外所有諸聲。雖

未得天耳。以父母所生常耳。皆悉聞知。如是分別種種音聲。而不壞耳根。

父母所生耳	清淨無濁穢	以此常耳聞	三千世界聲
一切比丘衆	及諸比丘尼	若讀誦經典	若為他人說
法師住於此	悉皆得聞之	復有諸菩薩	讀誦於經法
若為他人說	撰集解其義	如是諸音聲	悉皆得聞之
諸佛大聖尊	教化衆生者	於諸大會中	演說微妙法
持此法華者	悉皆得聞之	三千大千界	內外諸音聲
下至阿鼻獄	上至有頂天	皆聞其音聲	而不亂耳根
其耳聰利故	悉能分別知	持是法華者	雖未得天耳
	但用所生耳	功德已如是	

復次常精進。若善男子善女人。受持是經。若讀若誦。若解說。若書寫。成就清淨鼻功德。以是清淨鼻根。聞於三千大千世界。上下內外種種諸香。及聲聞香。辟支佛香。菩薩香。諸佛身香。亦皆遙聞。知其所在。雖聞此香。然於鼻根不壞不錯。若欲分別為他人說。憶念不謬。

是人鼻清淨	於此世界中	若香若臭物	種種悉聞知
諸比丘衆等	於法常精進	若坐若經行	及讀誦經典
或在林樹下	專精而坐禪	持經者聞香	悉知其所在
菩薩志堅固	坐禪若讀誦	或為人說法	聞香悉能知
在在方世尊	一切所恭敬	愍衆而說法	聞香悉能知
衆生在佛前	聞經皆歡喜	如法而修行	聞香悉能知
雖未得菩薩	無漏法生鼻	而是持經者	先得此鼻相

復次常精進。若善男子善女人。受持是經。若讀若誦。若解說。若書寫。得清淨舌功德。若好若醜。若美不美。及諸苦澀物。在其舌根。皆變成上味。如天甘露。無不美者。若以舌根。於大衆中有所演說。出深妙聲。能入其心。皆令歡喜快樂。有諸天子天女。釋梵諸天。聞是深妙音聲。有所演說。言論次第。皆悉來聽。及諸龍龍女。夜叉夜叉女。乾闥婆乾闥婆女。阿修羅阿修羅女。迦樓羅迦樓羅女。緊那羅緊那羅女。摩睺羅伽摩睺羅伽女。為聽法故。皆來親近。恭敬供養。及比丘比尼。優婆塞優婆夷。國王王子羣臣眷屬。小轉輪王。大轉輪王。七寶千子。內外眷屬。乘其宮殿。俱來

聽法。以是菩薩善說法故。婆羅門居士。國內人民。盡其形壽。隨侍供養。又諸聲聞辟支佛菩薩諸佛。常樂見之。是人所在方面。諸佛皆向其處說法。悉能受持一切佛法。又能出於深妙法音。

是人舌根淨	終不受惡味	其有所食噉	悉皆成甘露
以深淨妙聲	於大眾說法	以諸因緣喻	引導眾生心
聞者皆歡喜	設諸上供養	諸天龍夜叉	及阿修羅等
皆以恭敬心	而共來聽法	是說法之人	若欲以妙音
徧滿三千界	隨意即能至	大小轉輪王	及千子眷屬
合掌恭敬心	常來聽受法	諸天龍夜叉	羅剎毗舍闍
亦以歡喜心	常樂來供養	梵天王魔王	自在大自在
如是諸天衆	常來至其所	諸佛及弟子	聞其說法音
	常念而守護	或時為現身	

復次常精進。若善男子善女人。受持是經。若讀若誦。若解說。若書寫。得清淨身功德。得清淨身。如淨瑠璃。眾生喜見。其身淨故。三千大千世界眾生。生時死時。上下好醜。生善處惡處。悉於中現。及鐵圍山。大鐵圍山。彌樓山。摩

訶彌樓山等諸山。及其中衆生。悉於中現。下至阿鼻地獄。上至有頂。所有及衆生。悉於中現。若聲聞辟支佛菩薩諸佛說法。皆於身中現其色像。

若持法華者	其身甚清淨	如彼淨瑠璃	衆生皆喜見
又如淨明鏡	悉見諸色像	菩薩於淨身	皆見世所有
唯獨自明了	餘人所不見	三千世界中	一切諸羣萌
天人阿修羅	地獄鬼畜生	如是諸色像	皆於身中現
諸天等宮殿	乃至於有頂	鐵圍及彌樓	摩訶彌樓山
諸大海水等	皆於身中現	諸佛及聲聞	佛子菩薩等
若獨若在衆	說法悉皆現	雖未得無漏	法性之妙身
	以清淨常體	一切於中現	

復次常精進。若善男子善女人。如來滅後。受持是經。若讀若誦。若解說。若書寫。得清淨意功德。以是清淨意根。乃至聞一偈一句。通達無量無邊之義。解是義已。能演說一句一偈。至於一月四月。乃至一歲。諸所說法。隨其義趣。皆與一乘實相不相違背。若說俗間經書。治世語言。資生業等。皆順正法。三千大千世界。六趣衆生心之所行。心所動

作。心所戲論。皆悉知之。雖未得無漏智慧。而其意根清淨如此。是人有所思惟籌量言說。皆是佛法。無不真實。亦是先佛經中所說。

是人意清淨	明利無濁穢	以此妙意根	知上中下法
乃至聞一偈	通達無量義	次第如法說	月四月至歲
是世界內外	一切諸衆生	若天龍及人	夜叉鬼神等
其在六趣中	所念若干種	持法華之報	一時皆悉知
十方無數佛	百福莊嚴相	為衆生說法	悉聞能受持
思惟無量義	說法亦無量	始終不忘錯	以持法華故
悉知諸法相	隨義識次第	達名字語言	如所知演說
此人有所說	皆是先佛法	以演此法故	於衆無所畏
持法華經者	意根淨若斯	雖未得無漏	先有如是相
是人持此經	安住希有地	為一切衆生	歡喜而愛敬
能以千萬種	善巧之語言	分別而說法	持法華經故